



Suleriaaseq pillugu Ataatsimiititaliaq  
Maani

10. april 2015

**UPA 2015/150: Uunga siunnersuut: Inatsisartunut Naalakkersuisunullu il.il. ilaasortat  
aninggaasarsiaqartitaanerat il.il. pillugit Inatsisartut inatsisaata allanngortinneqarneranik  
Inatsisartut inatsisaat nr. xx, uu. qqqq 2015-imeerspoq  
(Inatsisartunut ilaasortat il.il. sulinngiffeqarallarsinnaanerannut il.il. malittarisassanik  
Inatsisartut aalajangersaanerat)**

Inatsisartut ataatsimiinneranni matumani Inatsisartunut Naalakkersuisunullu il.il. ilaasortat aninggaasarsiaqartitaanerat il.il. pillugit Inatsisartut inatsisaata allanngortinneqarneranik Inatsisartut inatsisissaattut siunnersummik Inatsisartut Siulittaasoqarfiat saqqummiussivoq. Siunnersuut Suleriaatsimut Ataatsimiititaliamut tusarniaanertalerlugu Inatsisinut Ataatsimiititaliamut suliassangortillugu innersuunneqarpoq.

Aningaasarsiaqartitaanermut inatsimmi sulinngiffeqarallartarnermut malittarisassat pisariillisarneqarnissaat kiisalu sulinngiffeqarallartarnermut najuutinngikkallartarnermullu Inatsisartut suleriaasianni malittarisassanik erseqqinnerusunik aalajangersaanissap Inatsisartunut suliakkiutigineqarnissaa inatsimmik allannguinissamut siunnersummik siunertaavooq.

Aningaasarsiaqartitaanermut inatsimmi atuuttumi § 6-imut inatsisissamik piareersaateqarnermi pitsaanngitsumik oqaasertaliisimaneq Inatsisissatut siunnersuutip aamma iluarsiivigissavaa.

**1. *Aningaasarsiaqartitaanermut inatsimmi sulinngiffeqartarnermut malittarisassat  
pisariillisarneqarnissaannik taamaalilluni sulinngiffeqarallartarnermut  
najuutinngikkallartarnermullu Inatsisartut suleriaasianni malittarisassanik  
erseqqinnerusunik aalajangersaanissap Inatsisartunut suliakkiutigineqarnissaanut  
siunnersummum Suleriaaseq pillugu Ataatsimiititaliaq oqaaseqaatissaqarpa?***

Siullermeerutaasumik suliarinninnermi sulinngiffeqarallarnissamut akuerineqarsinnaanermut sinniussamik aggersaanermut aningaasartuutinik ilaasortap pineqartup matussusiinissaata, siunnersuummi § 2, imm. 4-p oqaasertalerneqarsimanera malillugu, piumasaqaatigineqarsinnaanera partiimit ataatsimit isumaliornartoqartinneqarpoq.

Aalajangersagaq inatsimmik atuuttumik ingerlatseqqiisoq aatsaat atorneqarsinnaavoq, pissutissaqavilluni najuussinnaannginneq tamatumunngaluunniit assersuunneqarsinnaasumik

patsiseqarluni sulinngiffeqarallarnissamut akuersissuteqarneq pineqanngippat – tassa pisuni sulinngiffeqarallarnissap immikkorluinnaq itumik aningaasarsiaqaataanngitsumik akuersissutigineqarnerani.

Ilisimaneqartutut sulinngiffeqarallarnissamut akuersissuteqarnissamut sinniisussamik aggersaanermi aningaasartuutinik sulinngiffeqartup matussusiniissaanik piumasaqaateqarsinnaanermut periarfissaq Siulittaasoqarfip atornikuunngilaa.

Sulinngiffeqarallarnissamut qinnuteqaammut tunngavilersuut akuerineqarsinnaasup killinganiittutut nalilerneqarpat, aningaasartuutinullu matussusiniissaamik piumasaqaatitalerlugu sulinngiffeqarallarnissamut akuersissuteqarnerup saniatigut taamaallaat itigartitsissummik nalunaaruteqarnissaq qinigassatuaappat aatsaat aalajangersakkap taassuma atorneqartussaanera ilimagisariaqarpoq. Partiip sinniisussamik aggersaanissaq piumasarippagu aalajangersakkap aamma atorneqarsinnaanera isumaliutigineqarsinnaavoq, aggersaaneq pippat naak sinniisussap sulinngiffeqarallarnissamik qinnuteqartoq ulluni ikitsunnguani taamaallaat sinniisuuffgisussaagaa naallu tamanna aningaasartuutinik annertuunik nassataqartussaagaluartoq.

## ***2. Aalajangersagaq peerneqartariaqartutut Suleriaaseq pillugu Ataatsimiititaliamit isumaqarfigineqarpa?***

Aningaasarsiaqartitaanermut inatsimmi § 2, imm. 3, imatut oqaasertalerneqarnissaa siunnersuutigineqarsinnaavoq:

*Imm. 3. Aningaasarsiaqataasumik sulinngiffeqarallarsinnaaneq aatsaat akuersissutigineqarsinnaavoq Inatsisartunut ilaasortaq pissutissaqavilluni najuussinnaannngippat imaluunniit malittarisassat imm. 2 malillugu aalajangersarneqartut tassungalu assersunneqarsinnaasut malillugit.*

Oqaaseq ataaseq arlalliliunniit aalajangersakkamit katanneqarsimasungapput. Inatsisinut Ataatsimiititaliap allannguutissatut siunnersuummik saqqummiussineratigut tamanna iluarsiivigineqarsinnaavoq. Aalajangersagaq assersuutigalugu ima oqaasertalerneqarsinnaavoq:

*Imm. 3. Aningaasarsiaqataasumik sulinngiffeqarallarsinnaaneq aatsaat akuersissutigineqarsinnaavoq Inatsisartunut ilaasortaq pissutissaqavilluni najuussinnaannngippat imaluunniit pisuni imm. 2 malillugu aalajangersarneqartuni tassungalu assersunneqarsinnaasut malillugit.*

## ***3. Suleriaaseq pillugu Ataatsimiititaliaq tamatumunnga oqaaseqaatissaqarpa?***

Aningaasarsiaqartitaanermut inatsimmi § 2, imm. 4, , imatut oqaasertalerneqarnissaa siunnersuutigineqarsinnaavoq:

*Imm. 4. Inatsisartunut ilaasortaq pisuni immikkorluinnaq ittuni aningaasarsiaqataanngitsumik sulinngiffeqarallarnissamut akuerineqarpat, ilaasortaq aningaasarsiaqartitaassanngilaq aningaasartuutinulluunniit tapiissutinik pisartagaqassanani, taamatullu aamma sulinngiffeqarallarnerup nalaani soraarnerussutisiassanut ilaasortaajunnaarnersiutissanulluunniit katersaqarsinnaanani. Aammattaaq sulinngiffeqarallarnissamut akuersissuteqarnissamut sinniisussamik*

aggersaanermi aningaasartutinik Inatsisartunut ilaasortap akiliuteqarnissaa piumasaqaatigineqarsinnaavoq.

Aningaasarsiaqartitaanermut inatsimmi atuuttumi § 17 malillugu aningaasarsiat 10%-iisut annertussusilinnik soraarnerussutisiassanut tapiissutitut illuartitsinikkut kiisalu nammineq tapiissutitut aningaasarsiat 5%-iinik illuartitsinikkut soraarnerussutisiassanut ingerlaavartumik katersisoqartarpooq. Taamaammat aaqqissuussap taassuma equnneqarnerani apeqquataalerpoq aningaasarsiaqataanngitsumik sulinngiffeqarallarnerup nalaani soraarnerussutisiassanik katersisoqarsinnaannginnera aalajangersakkami siunnersuutigineqartumi attatiinnarneqarnissaa isumaqassanersoq.

Eqornerussaaq oqaraanni soraarnerussutisiassanut tapiissutinik tunniussisoqassanngilaq – kisianniuna oqaasertaliineq taamaattoq pisariaqanngitsutut nalilerneqarsinnaasoq: Aningaasarsiaqanngikkaanni soraarnerussutisiassanut tapit isummaminik 0 kr-iussapput.

#### **4. *Suleriaaseq pillugu Ataatsimiititaliaq tamatumunnga oqaaseqaatissaqarpa?***

Aningaasarsiaqartitaanermut inatsimmi § 2, imm. 5, imatut oqaasertalerneqarnissaa siunnersuutigineqarpoq:

*Imm. 5. Inatsisartunut ilaasortaq Naalakkersuisunut ilaasortatut atuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani ilaasortaajunnaarnersiutissanik katersaqarsinnaanngilaq.*

Aalajangersakkap allatut pisinnaatitaaffitsigut inissismanermik ingerlateqqinnissaa kissaatigineqartumik erseqqinnerusumik tamakkiinerusumillu nassuaateqartumik imatut oqaasertalerneqarnissaa isumaliutigineqarsinnaavoq.

*Imm. 5. Inatsisartunut ilaasortaq Naalakkersuisunut ilaasortatut atuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani Inatsisartunit aningaasarsiaqartitaassanngilaq sulinngiffeqarallarnerullu nalaani Inatsisartunit ilaasortaajunnaarnersiutissanik katersaqarsinnaanani.*

#### **5. *Suleriaaseq pillugu Ataatsimiititaliaq tamatumunnga oqaaseqaatissaqarpa?***

Qanigisamik toqusqartillugu pinartumilluunniit napparsimasoqartillugu akiliunneqarluni angalasinnaanermut aalajangersagaq atuumi § 2, imm. 4, siunnersummit § 4, imm. 5-itut nutaatut ikkunneqarpoq.

§ 4 Inatsisartunut ilaasortat Nuummiunngitsut ukiumut ataasiarlutik Inatsisartut katersuunnerinut atatillugu aappaminnik meeqqaminnillu Nunatta Karsianit akilerneqartumik Nuummut ingiallortilersinnaatitaanerannut tunngassuteqarpoq.

Tamanna tunngavigalugu isumaliutigineqarsinnaavoq qanigisamik toqusqartillugu pinartumilluunniit napparsimasoqartillugu akiliunneqarluni angalasinnaanermut aalajangersagaq ilumut § 4-mut tulluartuunersoq, imaluunniit § 3a-tut nutaatut ikkunneqaruni pitsaanerussannginnersoq (imaluunniit § 1, imm. 7-itut nutaatut).

## **6. Suleriaaseq pillugu Ataatsimiititaliaq tamatumunnga oqaaseqaatissaqarpa?**

Aningaasarsiaqartitaanermut inatsimmi § 6 imm. 10-11, imatut oqaasertalerneqarnissaat siunnersuutigineqarpoq:

*Imm. 10.* Napparsimaneq aamma qanigisap toquneranut napparsimarulunneranulluunniit atatillugu najuutinnginneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut isigineqassaaq. Najuutinnginnermi Namminersorlutik Oqartussani tjenestemandinut malittarisassassat qaqugukkulluunniit atuuttut malillugit akiliunneqarluni angalasoqarsinnaatitaavoq.

*Imm. 11.* Naartunermut, erninermut meeravissiartaarnermullu atatillugu sulinngiffeqarneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut najuutinnginnertut isigineqassaaq

Aalajangersakkat taakku danskisuui immaqa oqaasertalersugaanikkut pitsaanerpaaffimmienngillat.

Aalajangersakkanik allatut oqaasertaliineq una isumaliutigineqarsinnaavoq:

*Imm. 10.* Naalakkersuisut Siulittaasuannut Naalakkersuisunullu ilaasortanut napparsimaneq aamma qanigisap toquneranut napparsimarulunneranulluunniit atatillugu najuutinnginneq pissutissaqavilluni peqataannginnertut isigineqassaaq. Najuutinnginnermi Namminersorlutik Oqartussani tjenestemandinut malittarisassassat sukkulluunniit atuuttut malillugit akiliunneqarluni angalasoqarsinnaatitaavoq.

*Imm. 11.* Naalakkersuisut Siulittaasuannut Naalakkersuisunullu ilaasortanut naartunermut, erninermut meeravissiartaarnermullu atatillugu sulinngiffeqarneq pissutissaqavilluni najuutinnginnertut isigineqassaaq.

## **7. Suleriaaseq pillugu Ataatsimiititaliaq tamatumunnga oqaaseqaatissaqarpa?**

Paatsoortoqannginnissaa anguniarlugu Suleriaaseq pillugu Ataatsimiititaliamut ilanngullugu maluginiaqquneqarpoq, inatsisissatut siunnersuutip qulequtaani inatsisissap piareersarnerani kukkusummik annikitsumik Inatsisinut Ataatsimiititaliaq siumuisimasoq. Inatsisinut Ataatsimiititaliap allannguutissatut siunnersuusiorneratigut taanna iluarsiivigineqarsinnaavoq.

## **8. Suleriaaseq pillugu Ataatsimiititaliaq inatsisissatut siunnersummut allanik oqaaseqaatissaqarpa?**

Inussiarnersumik inuullaqqusillunga

Laura Tàunâjik  
Inatsisinut Ataatsimiititaliami Siulittaasoq